

AKTIVNOSTI ČLANICA OMLADINSKE MREŽE BIH



INSTITUT ZA RAZVOJ MLADIH KULT

Ul. 4. viteške brigade 34-36 BA, 71210 Ilidža, Sarajevo

E-mail: kult@mladi.org

Tel.: 033 778 778; fax: 033 778779

Web: www.mladi.org

✚ **Komisija za pitanja mladih Općine Zenica posjetila Institut**

Predstavnici/e Komisije za pitanja mladih Općine Zenica posjetili su Institut za razvoj mladih KULT. Prvo su obišli Obrazovno-raznodni centar za mlade SPAJALICA, a nakon toga i prostorije Centralnog ureda Instituta. Razgovaralo se o aktivnostima koje se provode u SPAJALICI, građanskim inicijativama, obukama i seminarima zahvaljujući kojim svaki mjesec SPAJALICU posjeti više od 800 mladih, te o planovima Instituta za naredni period.

✚ **Grad Sarajevo ima službenika za mlade**

U procesu jačanja radnog mjesta službenika/ce za mlade, Institut za razvoj mladih KULT provodi aktivnosti unaprjeđenja ove pozicije i prepoznavanja njenog značaja kako od strane vlasti tako i od šire javnosti. Važnost rada s mladima i aktivnog uključivanja mladih u procese odlučivanja prepoznata je i u Gradu Sarajevo koje je imenovao službenika za mlade.



Službenik za mlade isključivo se bavi pitanjima mladih u gradskoj zajednici. Službenik za mlade Grada Sarajeva i predstavnici/e Instituta za razvoj mladih KULT sastali su se i dogovarali aktivnosti za naredni period. Otvorenost i zainteresiranost obje strane rezultirat će budućim projektima, kao i obuci za službenike/ce za mlade. Institut za razvoj mladih nastaviti će s programom stručnog osposobljavanja za rad s mladima i radu s mladima.

✚ **Mladi trebaju i bit će glasniji u borbi za svoja prava**

Mladi trebaju i bit će glasniji u borbi za svoja prava kroz rad vijeća mladih/omladinskih savjeta – zvanična je poruka učesnika/ca **jedinstvenog omladinskog događaja - Omladinskog kruga**, koji je održan 29. juna 2013. u Sarajevu. Mediji i javnost često poručuju da su mladi pasivni i da se njihov glas ne čuje. Institut za razvoj mladih KULT kroz svoje programe i inicijative intenzivno radi na uspostavljanju održivih omladinskih struktura kojima upravljaju mladi. Cilj **Omladinskog kruga** jeste ukazati na važnost uloge vijeća mladih te formiranja vijeća mladih FBiH. Definiranjem institucionalne brige o mladima, vlasti su otvorile prostor za djelovanje mladih. Mladima su date mogućnosti da postanu aktivni, uključe se u procese donošenja odluka i učestvuju u planiranju i provođenju aktivnosti namijenjenih njima. Zastupanje mladih u procesima donošenja politika i saradnja s vladinim sektorom s ciljem poboljšanja položaja mladih jedan je od najvažnijih zadataka vijeća mladih. Također, ovom prilikom potpisana je **Povelja o prijateljstvu i saradnji vijeća mladih u Bosni i Hercegovini**, koju su inicirala vijeća mladih.

✚ U najmlađoj općini u BiH osnovano vijeće mladih

U Posušju, općini koja važi za najmlađu općinu u Bosni i Hercegovini s obzirom na prosječnu dob stanovnika, osnovano je vijeće mladih.

Vijeće mladih općine Posušje čine omladinska udruženja: Udruga mladih *Dnevni boravak*, Udruga za promicanje kulture APOLLO, Udruga za razvoj i unaprjeđenje civilnog društva PRIMUS i Torcida Posušje.



✚ Završen drugi modul obuke *Mladi odlučuju!* u BiH i Moldaviji

Značaj političkog/građanskog obrazovanja u procesu donošenja odluka naziv je drugog modula obuke *Mladi odlučuju!*. Pored mnoštva interaktivnih radionica i mini istraživanja, mladi su tokom drugog modula imali priliku ugostiti i mlade političare/ke, predstavnike/ce Mreže mladih političara/ki Rokada. Tokom druženja s mladim političarima/kama, polaznicima/ama obuke su prenesena vrijedna iskustva, kao i savjeti kako biti mlad i uspješno se baviti politikom. Obuka je održana u Obrazovno-raznodnom centru za mlade SPAJALICA. Po završetku drugog modula obuke u BiH treneri/ce su otputovali u Kichinau (Moldavija), gdje su također održali drugi modul obuke za 25 mladih moldavskih aktivista/ica. Nakon završenog drugog modula obuke mladi aktivisti/ce iz BiH i Moldavije napraviti će ljetnu pauzu te će obuku nastaviti početkom septembra 2013. g.

✚ Institut i CARE International u programu za Rome i Romkinje

Aktivno uključivanje i prava Romkinja u Zapadnom Balkanu jedan je od regionalnih projekata koji provodi CARE International i u Bosni i Hercegovini. Treninzi i seminari o različitim temama uključujući i rodno odgovorno budžetiranje koje je rađeno u saradnji s Institutom za razvoj mladih KULT doprinosi boljoj socio-ekonomskoj situaciji i položaju Romkinja u našoj zemlji, kao i Srbiji i Crnoj Gori. Romi i Romkinje iz ženske romske mreže *Uspjeh* programom obuke se osnažuju za učešće u kreiranju politika. Institut za razvoj mladih KULT je u radu s aktivistima i aktivistkinjama iz ženske romske mreže koju čine romska udruženja iz cijele Bosne i Hercegovine, kreirao okruženje razumijevanja roda, budžeta i rodno odgovornog budžetiranja koje će moći primijeniti u radu svojih udruženja i mreže.

✚ Do rodnoodgovornog budžeta kroz provođenje lokalnih građanskih inicijativa

Lokalne građanske inicijative su akcije građana/ki, pojedinačna ili zajednička usmjerena poboljšanje stanja u lokalnoj zajednici i društvu. Polaznici/e obuke Rodnopravni budžet za mlade su u mogućnosti i posjeduju kompetencije kojima uočavaju određene probleme mladih u svojoj zajednici te će sada imati priliku i riješiti ga provođenjem građanske inicijative. Prvi korak u primjenjivanju stečenog znanja jeste pisanje projektnih prijedloga, odnosno prijedloga rješenja određenog problema u svojim lokalnim zajednicama. U pisanju projektnih prijedloga jako je bitno da se posvete definiranju pravog problema ili potrebe mladih svoje zajednice te da jasno predstavite ciljeve, aktivnosti i rezultate projekta, kao i da odrede svoju ciljnu grupu, na koju će njihova ideja najviše utjecati.

Više o ovom pozivu na www.mladi.org.

✚ Sajberspejs (virtuelni online svijet) - siguran prostor za žene i djevojke

Narandžasti dan u prevenciji nasilja nad ženama i djevojkama danas slavi svoj prvi rođendan. Prije tačno godinu dana, 25. jula 2012. g. širom svijeta obilježen je prvi Narandžasti dan, ideja podizanja svijesti o alarmantnosti ovog problema i podrške prevenciji nasilja koja dolazi od mreže mladih UNiTE Global Youth Network ispred generalnog sekretara UN-a, Ban Ki-Moona. Narandžasti dan do danas je zaživio veliku pažnju javnosti i podršku građana/ki iz cijelog svijeta informirajući ih o rasprostranjenosti problema i mjerama njegovog netoleriranja. Kreativne i inovativne kampanje

prodirale su do svijesti prije svega mladih a onda i drugih populacija budući u njima solidarnost i potrebu za aktivnim uključivanjem u prevenciju i sprječavanje nasilja kojem svjedoče kao i pomoći i zaštiti ugroženih. Na 57. sesiji Komisije za pitanja žena, vlade su se obavezale kanalizirati i usmjeriti prilike koje nude informacione i komunikacijske tehnologije te virtuelni online svijet učiniti sigurnim mjestom za žene i djevojke.

✚ 55 lokalnih zajednica dalo podršku sistematiziranju pozicije službenika/ca za mlade

Institut je prikupljao pisma podrške za inicijativu priznavanja i sistematiziranja pozicije službenika/ce za mlade u protekla tri mjeseca od lokalnih zajednica u Bosni i Hercegovini.

Cilj inicijative je da se radno mjesto službenika/ce za mlade prizna u formalnim aktima i da se sistematizira u sistematizaciji zanimanja te da lokalne zajednice daju podršku razvijanju kataloga pitanja koja će se koristiti na stručnom ispitu pri upošljavanju novih službenika/ca za mlade. Pedeset pet općina i gradova u BiH je dalo podršku ovoj inicijativi.



✚ Više od 300 mladih posjetilo najveću manifestaciju mladih općine Ilidža



Volonteri/ke Instituta za razvoj mladih KULT su i ove godine uspješno realizirali 8. Dan mladih općine Ilidža. Dan mladih održan je ispred Obrazovno-raznodnog centra za mlade SPAJALICA i na Ljetnoj pozornici u Ilidži. Počeo je kreativnom radionicom za djecu: Najmlađi posjetioци/teljke uživali su u kreativnoj radionici iz koje su proizašli razni crteži i figure protkane dječijom maštom. Nakon kreativne radionice počele su prave male olimpijske igre u kategorijama poput trčanja u vreći, povlačenja konopca i sličnih zanimljivih igara.

Mladi su mogli praktično vidjeti i naučiti kako pružiti prvu pomoć i prevenirati neke od uobičajenih povreda uz sjajni tim Crvenog križa Ilidža. Ne smijemo zaboraviti ni simpatične klaune koji su svojim igrarijama nasmijavali posjetioce/teljke iscrtavajući razne crteže po nasmijanim licima mališana. Koncertom koji je održan uspješno je završen 8. Dan mladih općine Ilidža na kojem su učestvovali neafirmirani bendovi te odličnom atmosferom zabavili posjetitelje/ke koncerta.

✚ EKOGENERACIJA - obećava budućim generacijama čišću i zdraviju okolinu!

Čuvajmo okoliš za buduće generacije! - glavni je moto naše nove **EKOGENERACIJE**. Mališani Škole prijateljstva su tokom jula u prostorijama Obrazovno-raznodnog centra za mlade SPAJALICA imali priliku prisustvovati obuci o ekologiji. Obuka je trajala tri dana i prisustvovalo je dvadeset polaznika/ca. Obrađeno je nekoliko važnih tema u vezi s okolišem, otpadom i zdravom ishranom.

